

防

河

奏

議

防河奏議目次

卷二

增修兩岸險工

增修埽壩防風

改估臨河增卑培薄工程

條陳河工善後事宜

清查黃河額夫工食

題明免報查工日期

搶築蘭陽南岸埽壩等工

估帑曹單二縣大堤

芝蔴莊添設弁兵

挑挖雷家寺引河

附紀

續留効力人員

修建耿家寨埽壩等工

防河奏議卷二

李天慶疏論黃淮兩河急宜修葺務期穩固

增修兩岸險工

題爲欽奉

上諭事雍正三年八月初五日准工部咨開奉

上諭今歲入夏以來雨水過多朕心念黃淮伏秋

兩汛必然水勢浩瀚甚以爲憂所以從前批嵇

曾筠奏摺有無日不神馳黃淮兩岸之語今據

田文鏡奏稱儀封縣南岸大寨蘭陽縣北岸板

廠後兩處衝開決口各十餘丈此皆朕躬不德
或用人行政有缺失之所致返躬惕勵夙夜不
安其衝決堤工可星速會同副總河嵇曾筠率
各屬河員併力搶築務期永久堅固其一帶危
險工程亦當增卑培薄預爲之防至被災人民
着速委能員實心確查應賑恤者卽動正項錢
糧衝沒田地詳細勘估應豁免者題請豁免朕
從前曾命將河屬官員分別議敘今儀封蘭陽
兩處旣被衝決例應叅處但朕自念不德其疎

防各官吏止停其議敘不必叅處賠修亦着寬免特諭欽此相應行文副總河可也爲此合咨前去查照施行等因到臣准此除儀封之大寨并蘭陽之板廠後漫口俱各尅日堵築完竣其完竣日期當經

題報在案所有應估增卑培薄堤工隨行各道廳欽遵去後今據造冊詳請會核

題估等情到臣據此該臣等會看得豫省黃河兩岸土埽工程荷蒙

聖恩估計加幫并增歲搶二修業已綢繆未雨緣
上年秋水泛漲將儀封大寨蘭陽板廠二處
漫溢又蒙

特沛恩綸將一帶危險工程亦當增卑培薄預爲
之防臣等欽承之下仰見

皇恩浩蕩慎重周詳隨經行令管河道廳逐細查
勘確估幫築臣等復加親勘兩岸堤工原有
暫緩加幫之大堤并有未經估計加修之遙
月等堤又有雖經加幫或因本地窪下未能

與兩頭一律平高者更有兩岸堤根被沙淤
墊堤身卑矮亟應加高培厚者今據該道詳
稱查得開封府上南河廳屬鄭州應增高培
厚大堤共工長一千四百六十二丈估加新
土四萬六千二百七十七方二分共實銀五
千四百八十一兩九錢七分零又來童寨舊
斷堤工長二百四十丈估加新土一萬二千
八百三十五方五分共實銀一千二百三十
二兩二錢零中牟縣應增高培厚大堤共工

長一千四百五十五丈五尺估加新土七萬
七十九方四分共實銀六千七百二十七兩
六錢二分零月堤共工長三百六十五丈五
尺估加新土一萬七千一百六十八方六分
共實銀一千六百四十八兩一錢九分零開
封府下南河廳屬祥符縣南岸應增高培厚
大堤共工長七千七百九十八丈五尺估加
新土三十一萬四百六十方九分零又攔土
歸工長十三丈以上土埽二工共實銀三萬

九百六十五兩一錢八分零月堤共工長五
千二百六十三丈二尺估加新土十八萬六
千三百五十方七分零共實銀一萬八千六
百七十二兩五錢零陳留縣南岸應增高培
厚大堤共工長一千八百八十八丈估加新
土三萬五千四百六十一方六分共實銀三
千六百七十一兩八錢八分零蘭陽縣南岸
應增高培厚大堤共工長七百五十丈估加
新土一萬九千二百八十二方共實銀一千

八百五十一兩七分零儀封縣南岸應增高
培厚大堤共工長四千一百六丈估加新土
十二萬一千四十九方三分共實銀一萬二
千七百八十七兩三錢一分月堤工長二千
六百四十九丈估加新土十五萬六百四方
六分共實銀一萬四千六百二十二兩二錢
三分零歸河廳屬考城縣應增高培厚大堤
共工長二百三十丈估加新土一千九百一
十方共實銀二百七十五兩四分商邱縣應

增高培厚大堤共工長二千三百四十四丈
估加新土八萬七千八十三方五分共實銀
八千四百一十七兩六錢二分零虞城縣應
增高培厚大堤共工長二千五百二十丈三
尺估加新土一十二萬三千七百四十六方
四分共實銀一萬三千五百四十四兩八錢
七分零懷慶府黃河廳屬武陟縣應增高培
厚大堤工長二千三百九丈又填實釘船幫
大壩後月牙池週圍長一百四十四丈共估

新土十一萬四千二百二十方七分共實銀
一萬一千二百七十六兩九錢五分零開封
府上北河廳屬原武縣應增高培厚大堤共
工長一千二百六丈估加新土二萬三千三
百四十四方共實銀二千八百九兩七錢二
分零陽武縣應增高培厚大堤共工長三千
七十五丈估加新土八萬八千八十九方九
分共實銀一萬二千六百八十四兩九錢四
分零月堤工長三百四十丈估加新土一萬

二千六百方共實銀一千二百九兩六錢封
邱縣應增高培厚大堤工長四百六十丈估
加新土二萬六百七十方共實銀二千九百
二十二兩七錢二分開封府下北河廳屬祥
符縣北岸應增高培厚大堤工長四十五丈
估加新土二千三百八十二方七分共實銀
二百二十八兩七錢四分子堤工長一千四
十三丈估加新土四萬三千一百二十六方
共實銀四千一百四十兩九分零蘭陽縣北

岸應增高培厚大堤工長四千一十四丈五
尺估加新土一十六萬八千六百九十九方
六分共實銀一萬八千八百六十七兩二錢
五分零月堤工長一千九百四十三丈估加
新土一十二萬七百八十四方一分共實銀
一萬一千五百九十五兩二錢七分零儀封
縣北岸應增高培厚大堤工長一千七百五
十一丈估加新土十萬四千五百三十八方
七分共實銀一萬二千五百四十五兩六錢

零格堤工長四千五百三十丈估加新土二
十八萬八千二百七十方一分共實銀二萬
七千六百七十三兩九錢三分零又山東黃
河廳屬劉家口曹縣外月堤工長七百五十
七丈五尺估加新土四萬六千五百九十九
方七分共實銀五千三百五兩一錢八分零
以上各廳所屬豫省大堤通共估用土方銀
一十四萬五千五十八兩五錢四分零月格
堤工通共估用土方銀八萬七百九十四兩

四分零二共銀二十二萬五千八百五十二
兩五錢九分零俱係據實估報委無浮開等
情冊詳前來臣等復加親核無異因係緊要
工程照例行令布政司撥發帑銀擇險先修
業經遴委幹員分段僱築以禦汎水一面移
咨山東撫臣飭令黃河廳將劉家口曹縣堤
工一例動帑興築除原冊送部查核外臣謹
會同河臣齊蘇勒撫臣田文鏡合詞具

題伏乞

皇上睿鑒勅部議覆施行雍正四年三月十三日
題奉

旨該部速議具奏欽此部議准行雍正四年四月
初九日奉

旨依議速行欽此

增修埽壩防風

題爲亟請增修埽壩加鑲防風以保堤工以資
捍禦事該臣等會看得豫省土脉虛鬆一切
堤工必須相機修守保護萬全仰蒙我

皇上洞悉河防特頒

諭旨將危險工程增卑培薄預爲之防當經轉飭
欽遵現在另冊估報但連年黃水泛漲致將
兩岸堤根沙停淤墊堤身多有卑矮兼以堤
內地勢甚窪一遇汎水長發大溜頂衝甚屬

危險亟應擇其險要處所增修埽壩鑲做防
風保護堤工方克有裨今據管河道副使佟
鎮詳稱查上南河廳屬鄭州汛內薛家寨上
下一帶險工長七百六十丈應鑲防風實估
用工料銀五千一百五十三兩九錢六分又
來童寨險工長二百四十丈應下埽包裹堤
頭接鑲防風實估用工料銀一千六百三十
七兩五錢八分零以上共估工料銀六千七
百九十一兩五錢四分零下南河廳屬祥符

縣南岸程家寨險工長二百三十丈應下埽
加鑲實估用工料銀六千六百三十二兩六
錢八分零蘭陽縣南岸河渠險工長一百二
十丈應鑲防風實估用工料銀六百六十三
兩六錢又韓陵寺險工長一百丈應鑲防風
實估用工料銀五百五十三兩儀封縣南岸
馬家店險工長六十丈應鑲防風實估用工
料銀三百九十八兩一錢六分又元家莊險
工長一百丈應下埽加鑲實估用工料銀八

百六十七兩八分零又周家莊險工長八十丈應下埽加鑲實估用工料銀七百九十五兩八錢四分又鹿家口月堤東壩險工長六十丈應下埽加鑲實估用工料銀五百六十六兩六分零又鹿家口月堤北壩險工長一百丈應下埽加鑲實估用工料銀九百四十九兩七錢一分零以上祥蘭儀三縣南岸共估工料銀一萬一千四百二十兩一錢五分零歸河廳屬考城縣汛內自司家道口起至王

家道口止險工長六百二十一丈內應建磯
嘴壩三座順長共二十一丈接鑲防風六百
丈實估用工料銀五千一百八十一兩四錢
六分零又十四堡險工長二十六丈內應建
磯嘴壩一座順長六丈接鑲防風二十丈實
估用工料銀六百一十三兩三錢四分零商
邱縣汛內自考商交界起至楊家堂止工長
七百七十丈內擇險應做防風二百丈實估
用工料銀一千六十一兩七錢六分又楊家

堂小月堤險工長七十二丈應下埽加鑲接
鑲防風實估工料銀三百二十九兩五錢四
分零虞城縣汛內張家潭險工長二十七丈
五尺應下埽加鑲接鑲防風實估工料銀五
百一十九兩六分零以上考商虞三縣共估
工料銀七千七百五兩一錢六分零上北河
廳屬原武縣北岸胡唐莊險工長六十丈應
鑲防風實估用工料銀三百一十九兩二錢
又朱家莊後大堤堯灣險工長六十五丈應

鑲防風實估用工料銀三百六十五兩七錢五分又柳園村前險工長七十丈應鑲防風實估用工料銀三百七十二兩三錢又劉務村後險工長二百丈應鑲防風實估用工料銀一千六十三兩九錢七分以上共估工料銀二千一百二十一兩二錢二分下北河屬蘭陽縣北岸管李寨撐堤橫堤共長四百八十四丈應下埽加鑲接鑲防風實估用工料銀三千七百一十三兩五錢六分零又管

李寨圍堤內險工長六百八十丈應鑲防風
實估用工料銀三千六百九兩九錢八分零
又耿家寨險工長一百六十丈應下埽加鑲
實估用工料銀三千五百六十九兩二錢八
分儀封縣北岸雷家寺迤西險工長一百二
十丈應鑲防風并下埽頭埽實估用工料銀
九百一十兩四錢一分零又宋家營一帶險
工長六十六丈應下埽加鑲實估用工料銀
三百九十二兩五錢四分零又十九堡月堤

險工長五百二十二丈應下防風實估用工料銀二千八百八十六兩六錢六分以上蘭儀二縣北岸共估工料銀一萬五千八十二兩四錢四分零通共估用工料實銀四萬三千一百兩五錢三分零委無浮冒造具估冊詳請會核

題估發帑興修統俟本年十月內將用過工料彙冊

題報次年四月

題銷等情冊詳前來臣等親勘復核無異因係
緊要工程除照例行令布政司先行撥帑乘
時辦料興修并原冊送部查核外相應會同
河臣齊蘓勒撫臣田文鏡合詞具

題伏乞

皇上睿覽勅部議覆施行雍正四年三月十三日
題奉

旨該部速議具奏欽此部議准行雍正四年四月
初九日奉

旨依議速行欽此

改估臨河增卑培薄工程

題爲亟請改築月堤並添建戩堤貼堤以保險
工以節帑項事雍正四年九月十一日准工
部咨開都水清吏司案呈查得副總河嵇曾
筠咨稱黃河水性變遷靡常惟在審時度勢
相機修築豫省臨河增卑培薄工程奉部覆
准在案但前項工程皆在去冬今春水勢未
長以前約照上年之情形勘估現今河流長
發又有變遷若不相機改估誠恐輕重失宜

緩急倒置相應咨請改築俟工完之日逐款聲明造冊彙銷除一面發帑委員星夜價築外擬合咨明等因前來查豫省臨河增卑培薄工程前據副總河疏稱關係緊要業經本部覆准修築在案今雖據稱河流變遷應相機改築不便據咨遽議應行副總河具題到日再議可也爲此合咨前去查照施行等因到臣准此當經轉行遵照去後今據河南管河道副使佟鎮詳請仍照前冊會核具

題准其改築俟工完彙冊

奏銷則節帑保工實有裨益等因到臣據此該

臣等會看得豫省臨河堤工蒙我

皇上睿謨廣運籌畫周詳

勅令增卑培薄預爲修防前經臣等欽遵確勘會

核

題估奉部覆准一切緊要堤工俱經遴員分築

竭力價催在案但前項工程皆在去冬今春
水勢未長以前約照上年之情形勘估現今

河流長發忽有變遷伏查河工先估後做工程有臨修之時形勢更改化險爲平原應移平就險若不因時相機改估誠恐輕重失宜緩急倒置今查下南河廳屬應停修儀封縣南岸大寨北面殘缺舊月堤一道工長二千九十七丈撐堤一道工長一百二丈共原估銀一萬二千六百六十三兩八錢三分零今移於南面改築月堤一道工長七百一十四丈夾壩後幫築戩堤一道工長一百零一丈

又李家莊堤灣起至五堡迤南止幫築貼堤
工長七百零七丈又自十六堡迤東起至十
八堡迤西止幫築貼堤工長四百丈又蘭陽
大堤自陳留交界起至管家水口止幫築貼
堤工長六百丈共工長二千五百二十二丈
共估銀一萬二千五百五十四兩七錢二分
零計節減銀一百九兩一錢零又儀封縣南
岸大堤自十三堡東起至大王廟止加幫工
長三百一十丈之內應停修工長一百丈計

原估銀二百四十八兩八錢八分今移於三十三堡起至趙家埠口東止改幫大堤工長一百丈共估銀二百二十三兩八錢計節減銀二十五兩八分又歸河廳屬應停修虞城縣黃堽壩東自下壩尾起至裴家莊廢堤頭止工長五百九十二丈五尺共原估銀二千八百七十六兩九錢七分零今移於商邱縣自考城縣交界起至楊家堂止並李江莊河夫營天齊廟等處添築貼堤四段共工長一

千四百六十丈又虞城縣待賓寺一帶添築
貼堤工長二百三十五丈五尺共估銀二千
七百九十一兩九錢九分零計節減銀八十
四兩九錢八分零以上各工均應相機因時
改築前據該道造冊改估前來當經臣等會
核將工段丈尺銀數一面咨明工部俟工完
逐款聲明彙冊

題銷一面發帑委員星夜償築以資保護在案
今准部覆行令具題到日再議等因行據管

河道副使佟鎮詳覆前來相應會同河臣齊
蘇勒撫臣田文鏡合詞具

題伏乞

皇上睿鑒勅部議覆施行雍正四年九月二十六
日

題奉

旨該部議奏欽此部議准行雍正四年十一月十
六日奉

旨依議欽此

條陳河工善後事宜

奏爲大工初竣善後宜詳謹陳末議仰祈

睿鑒事竊照豫省黃河兩岸隄防廢弛年久蒙

皇上拯溺鴻仁發帑興修

宸謨指示底績安瀾今南北大堤加幫完竣歲搶
二修因地制宜一切遙月格堤兼修並舉而
增卑培薄又復預爲防範皆荷我

皇上睿慮精詳所以無微不至從茲遞年修守自
可永慶平成矣臣以菲材謬膺

簡任

隆恩叠被

聖訓頻加第愧知識短淺寸長未効捫心夙夜感
悚交并唯有殫竭愚誠以冀仰報涓埃所有
芻蕘末議敬爲我

皇上陳之

一歲修埽料宜節減清釐也查豫省大工以
及搶修埽料所需秣藉俱係臨時濟急購
運艱難每百觔實銷銀九分無容置議外

惟題定歲修一項不比從前創始今定於
秋成後卽發銀各廳及早購辦每百觔七
分便可置買務於八月內道庫發銀勒限
十月內照額辦足卽令管河道查驗如有
短少卽以辦料遲延叅處除穀草椿蔴臣
逐年體訪額價萬難議減其秫稽一項請
於雍正五年承辦六年歲修每百觔卽照
七分報銷則每年億千萬束之秫稽所節
帑金便可積零成鉅而仍於工程無悞再

查河工埽料柳束爲重河南柳園無多採
用殆盡且圍臨灘地每年河水汕塌以致
圍額愈少柳束無出秣稽代柳費帑愈多
伏查民間灘地凡有坍塌卽將新淤之地
抵補相沿已久獨至柳園此地一經坍塌
彼地雖有新淤官無界址民多隱佔亟應
清釐以垂永久合無仰懇

皇上勅下撫臣行令沿河州縣檢查地冊會同廳
汛將現存之柳園丈勘立界已坍塌之柳園

此冊彼淤釐剔清查撥補完額則無害於民而有益於公園額無虧嚴督河員廣爲栽植庶柳束繁多埽料錢糧可以漸次節省矣

一印河各官宜通融調補也查豫省管河道以下設有廳汛河員以協佐府州縣印官但向來定例印官兼司民事係撫臣題授河員端理河工係河臣題授不特循資陞調分爲兩途卽辦事同城亦不無岐視合

無仰懇

皇上天恩准於定例之外通融調補如沿河府州
縣有才嫻河務者准其陞調河工道廳而
河工廳汛有才守兼優者准其陞調沿河
府州縣一轉移間彼此均有裨益庶印河
各官益勵寅恭而河防吏治互相講究學
習俱當協力同心爲地方保障矣

一防河兵弁宜酌增端設也查豫省堤工蒙
我

皇上乾綱獨斷調撥江南河兵一千名分派防守
嗣因更番遠涉往返需時經臣條奏請將
兩岸堡夫仍留學習樁埽如果熟諳拔充
河兵二三年間若得土著河兵五百名則
南兵一千名俱可發回已奉部議覆准在
案今查堤工初竣樁埽繁多汛險工長不
敷應用河兵汛弁自應隨時籌畫伏懇

聖恩仍照一千名之數

勅部再行議覆於堡夫內逐漸拔補足額卽將南

兵逐漸扣除發回原汛則豫省兵皆土著以千名之兵守千里之堤庶椿埽嫻熟而工程鞏固再查河兵散處工所無人管押恐其偷安多事是以江南撥來千把總六員用資約束若南兵發回該弁等原各有耑汛非可久留豫省者請耑設千總二員把總四員分隸開封府兩岸河廳管轄至歸德府通判汛內應將原設武陟千總二員內調往一員分撥河兵一百名移駐歸

德各工交與該弁管領則豫工兵弁整飭而修防無悞矣

一月堤防守宜增設抽撥也查豫省大堤每
隔二里額設堡房一座分駐堡夫令其修
墊水溝浪窩巡查獾洞鼠穴但重門保障
實倚月堤以資捍衛今歲欽奉

諭旨增卑培薄案內臨河月堤居其大半而堡房
未設防守無人風雨損傷河水漲漫不無
意外伏乞

皇上勅下部議遵照大堤之例每隔二里增設堡房一座給價三兩着令地方官建造速完至堡夫一項若再議增恐錢糧過費合無於臣奏請仍設河兵一千名內酌量調撥月堤防守則無容增設堡夫而臨河險工堤埽兼有倚賴矣

一汛地遼濶宜添設微員也查開封府南岸地方祥符縣堤長八十六里止有縣丞一員工長汛遠策應維艱况近日險汛下移

祥符一帶工程更爲險要似應添設祥符南岸主簿一員分段管理再開封府北岸地方印捕各官俱在南岸且與直隸長垣山東曹縣等處犬牙相錯民俗刁頑祥符蘭陽儀封北岸雖有主簿俱崑管河務不理民事且堤埽綿長奔走寫遠募夫辦料呼應不靈合無添設巡檢二員一駐祥符陳留適中之地一駐蘭陽儀封適中之地如遇工程告險卽着協同廳汛募夫辦料

竭力搶護所有一切逃盜事宜令其盤查稽察仍聽該縣督率管轄再查祥陳等處北岸舊有汰黃堤一道以爲後障例係民修應責令該員督率附近莊民勤加修墊則寧謐地方而於河務工程俱有裨益矣一撥料浚船宜循例添設也查江南黃運兩河凡有歲搶修工程之處卽設浚柳船隻以資撥運料物所以一呼卽應往來如織料物湊手今豫省上至武陟下至虞城俱

有歲搶二修而撥運無船每每此工貯料
彼工告險不能立時濟急且當汎水長發
之際一望汪洋堤外被水居民望救甚迫
莫能往援是豫省浚船不但運料兼可濟
人更甚於江南也伏乞

皇上天恩勅部查照南工浚船則例寬長丈尺需
用工料銀數卽於節省項下給發各廳令
其每汎造船五隻堅固如式卽撥河兵運
駕看守照例按年修理勿使朽壞則工程

民命均有攸賴矣

以上六條臣親歷河干目擊情形敬抒臆見
上竄

宸聰是否有當伏乞

皇上訓示遵行雍正五年正月初四日

奏奉

旨着怡親王順承郡王大學士富寧安九卿會議
具奏欽此議覆准行雍正五年二月初六日奉
旨依議欽此

清查東省黃河額夫工食

題爲清查東省黃河額夫工食之積弊仰請

聖裁杜虛冒以收實效事竊查東省黃河廳屬之
曹州曹縣單縣金鄉定陶城武等六州縣額
設徭夫一千三百零八名每歲十二個月共
工食銀一萬五千六百九十六兩彙解黃河
廳轉給該管各官爲幫堤之用定制相沿其
來已久嗣後將正十一十二三個月共工食
銀三千九百二十四兩撥解運河廳庫其黃

河廳止解自二月至十月九個月共工食銀一萬一千七百七十二兩向例每歲額定加土十一萬七千七百二十方年終造冊報部銷算此外又有幫貼徭夫銀錢合計六州縣共幫貼銀七千二百一十七兩八錢一分因係歷年成例曾經河臣檄飭解廳轉發臨河州縣存貯備用在案今臣細加訪查徭夫工食一項雖有額設名數而做工多係總甲承攬臨時僱募其間不無影射虛糜至歷年歲

修報銷雖係按銀計土然未將新舊土方先行確估無憑查考而幫貼銀錢尤屬有名無實半係印河各官之陋規半係胥役甲長之侵蝕其於工程夫役兩無裨益伏思除弊務絕其根而課工費核其實凡加幫工程必先將舊堤頂底高寬若干共計舊土若干量估明確然後將加至頂底高寬若干應用新土若干應給方價若干一分晰估算方無浮冒况堤工段落各有長短之不齊土方因之

增減而取土又有難易之不同給價遂有多寡今按銀計土斷不能歲歲相同若不計短長不論難易不分新舊懸定土方以符銀數每歲加增如出一轍其中豈無牽混且錢糧欸項理應盡一各歸各欸庶日後便於

奏銷今以黃河廳屬之徭夫工食而撥入運河廳庫月稽年考一欸兩銷甚非釐剔之良法猶恐將來修工不敷應用另行

請撥轉滋煩擾合無仰懇

聖恩請自雍正五年爲始將黃河廳屬之全年工食并幫貼銀兩飭令各該州縣彙解該廳轉交曹縣貯庫查明堤工有應行加幫之處照例按段確估舊提高寬若干加至高寬若干除舊土若干應加新土若干旱工每方給銀九分六釐水工每方給銀一錢四分四釐旱攸分方價又可節省每年先期勘明造冊題估遴選諳練各官分段修築務期堅固如式以資抵禦倘該廳發銀扣尅承修官有丈尺

短少及潦草虛鬆等弊卽行指名

題叅從重治罪年終統算共加過新土若干共
用銀若干仍照舊例報部核銷如工程平穩
有可停修之處卽將存剩銀兩留爲下年加
幫之用如此則上不侵帑下不冒工堤土尺
寸皆有着落錢糧絲毫皆歸實用而夫役總
甲墨吏奸胥不得上下其手矣臣從清核錢
糧保守工程起見且挑汎在卽亟應擇險確
估興工不敢因循貽悞相應據實上陳是否

允協臣未敢擅便理合恭疏具

題伏乞

皇上睿鑒勅部議覆施行雍正五年二月十三日
題奉

旨該部議奏欽此部議會同總河山東巡撫畫一
妥議具題等因奉

旨依議欽此欽遵會同河臣齊蘓勒山東撫臣塞
楞額合詞具

題奉

旨該部議奏欽此部議准行雍正五年十二月初

十日奉

旨依議欽此

題明免報查工日期

題爲

題明事竊臣奉

命兼管山東黃河工程臣接准部咨隨即遵

旨前赴東省將曹單等縣臨河堤埝工程逐細查

勘所有應修應築之處并一切應行事宜臣

一面審量緩急上緊料理應動帑者卽行

題請應備料者飛飭趲辦應察核者現在清查

應估計者按段確估容臣分別先後次第入

告請

旨遵行外但查各省督撫出境回署例應具疏

題報臣在豫四載原無一定衙舍惟視水勢工程之平險上下遷移防護不敢坐守安居因上年險勢下移蘭陽儀封考城等縣堤工均須加緊修守臣已經

題明移駐蘭考適中之儀封縣濱河處所往來策應在案今蒙

聖恩命臣兼管兩省堤工查濱河埽壩如豫省之

三家莊東省之芝麻莊均屬最爲險要二工
界連接壤卽遇汎水長發臣駐劄適中兩頭
策應可以朝往夕還其蘭陽等處險工相距
亦不甚遠俱可隨時查閱非若他省督撫經
年一再出者可比合無仰懇

聖慈嗣後臣往來東豫兩省工次免其

題報既可省案牘之煩而亦不致以微臣出入
細故屢瀆

宸聰矣相應恭疏

題明伏乞

皇上睿鑒施行雍正五年二月十三日

題奉

旨該部知道欽此

搶築蘭陽南岸埽壩等工

題爲亟請搶築埽壩防風並創建月堤加幫戩
隔等堤工程以資重障以衛民生事該

臣等

會看得蘭陽縣南岸管梁蔡耿四水口一帶
堤工係遠年漫口南臨深潭北靠支河且地
處窪下河勢南趨崖岸日漸坍塌堤根相距
大河僅止里許一遇水長全河大溜直入支
河衝射堤根危險至極今相度情形亟須將
梁蔡耿三水口迎溜處所邁下長椿大埽丁

鑲防風上下接做護崖順埽一律加鑲堅固
再於四水口大堤南面幫戩加高並於堤南
創築魚鱗月堤四道以作重門之障方保萬
全又二堡迤東起至三堡迤西止大堤一段
原於陽武大堤案內加幫但該工堤北舊有
河形地處窪下上年水發沿堤走溜勢甚洶
湧兼之堤南積水浸泡實屬堪虞亟須幫築
貼堤以資鞏固又祥符縣南岸自李盤寨後
起至馬頭北埠口止月堤一道近因黃河大

溜日漸南趨該工單薄卑矮一遇汎水長發湧注堤根危險尤甚亟應加幫高厚以資抵禦又程家寨月堤一道前於陽武大堤等事案内雖經加幫但該工逼近黃河上年汎水長發沿堤走溜洶湧湍激危險異常亟應再行加幫高厚方保無虞又祥陳二縣舊有民堤一道年遠失修向因伏秋水長將歐家澗蓋家莊等處漫溢缺口以致上下間斷一遇汎水全河之勢直注口門祥陳一帶村莊多

有被淹下游一帶堤根頂衝油刷爲害甚巨
亟須將歐家潭缺口下埽鎮填並幫築裏戲
接至民堤兩頭仍將王家樓郭家寨等處卑
薄民堤一律加幫高厚以資捍衛又陳留縣
七八九堡大堤地勢窪下每遇汎水長發直
射堤根沿堤拖溜風浪撞擊甚屬危險堤北
舊有隔堤一道年久失修卑矮殘缺一經水
長漫堤過水雖有重門之名並無捍禦之實
必須加幫高厚接至兩頭老堤並將老堤一

律增培庶大堤得收外衛之固而迤下一帶
堤根可免衝刷之慮查蘭陽縣梁蔡耿三水
口邁埽加鑲並上下護崖順埽防風共工長
四百三十丈實估料物夫工銀一萬一千八
百一十二兩四錢九分又四水口大堤幫戩
加高共工十一段長一千三百五十七丈堤
南創築魚鱗月堤四道共工長一千七十二
丈共需土一十六萬五千八百八十六方六
分分別遠近水旱方價實估銀一萬九千二

百六十五兩二錢八分又二堡迤東起至三
堡迤西止大堤長三百二十丈加幫貼堤需
土六千七百二十方分別水旱方價實估銀
八百六兩四錢又祥符縣李盤寨後月堤加
幫工長一千四百五十丈需土五萬一千二
百四十五方實估銀四千九百一十九兩五
錢二分又程家寨月堤兩面加幫貼戩工長
一千二百八十九丈需土四萬二千六百三
十方分別水旱方價實估銀五千二百六十

兩六錢零又歐家潭缺口下埽加鑲並上下
雁翅共工長一百二十丈實估料物夫工銀
一千三百九十八兩二錢六分零又王家樓
加幫民堤並歐家潭填墊河形接築堤工長
一千一百九十丈郭家寨接幫民堤長一千
一百一十九丈共需土二萬四千八百六十
一方四分實估銀二千三百八十六兩六錢
九分零又陳留縣七八九堡大堤北首加幫
隔堤並接幫兩頭老堤共工長七百七丈需

土一萬七千三百五方二分實估銀一千六百六十一兩二錢九分零俱係確核至再據實估計毫無浮冒今據管河道祝兆鵬造冊詳請會核

題估先行發帑乘時興工儉築前來臣等親勘復核俱係相機緊要工程務於汎水未長之前及時興工方克有濟除一面檄飭管河道先於河庫銀內借發該廳辦料募夫遴委諳練河員上緊督催儉築一面照例行令布政

司撥帑給發違項并原冊送部查核外

臣謹

會同河臣齊蘇勒撫臣田文鏡合詞具

題伏乞

皇上睿鑒勅部議覆施行雍正五年四月二十日

題奉

旨該部速議具奏欽此部議准行雍正五年五月

十六日奉

旨依議速行欽此

估幫曹單二縣大堤

題爲亟請加幫大堤并鑲護防風以資捍禦事
該臣等會看得東省曹單二縣臨河大堤綿
長二百三十餘里乃全河之屏障密邇運道
最關緊要近年以來因險勢下移頂衝掃灣
處所更加湍激水長則出漕泛濫沿堤走溜
堤工叠受衝刷其地勢低窪之處水落則積
水停蓄終年不乾每遇風浪堤身屢被撞擊
多有卑薄殘缺實屬堪虞亟須先行擇險確

估加幫一律高厚再險要之工所築新土若不鑲護防風一遇水長溜逼堤根勢難捍禦今相度情形必須一面加幫一面相機鑲護防風方免汕刷之患伏查東省止有芝蔴莊埽工一處經

題明撥帑辦料歲修其餘堤工向無額設辦料銀兩今芝蔴莊所備料物止足防護該工之用不克分濟別工合無仰懇

聖恩先行撥帑乘時償築堤工并預備料物俟加

幫工程告竣卽行相機鑲做防風以保萬全
查曹單二縣應行加幫堤工共長八千九百
五十一丈四尺除舊土外應加新土三十三
萬三千九百六十九方據實分別方價共該
土方銀三萬六千六百二十四兩二錢九分
零又陳家樓前黃奶奶廟等處應行加鑲防
風工程二段共長九百九十六丈五尺共估
銀五千三百三十六兩三錢一分零以上堤
埽等工共需銀四萬一千九百六十兩六錢

零第查曹州等六州縣額設黃河修堤徭夫
工食并幫貼銀兩現准工部咨覆令臣會同
河撫二臣虛公畫一妥議尙未議覆且此項
銀兩不特不敷所估之數又兼徵解不時難
以濟急

請於山東藩庫內動撥銀四萬一千九百六十
兩六錢零移解兗寧道庫轉給該廳遴員僱
築堤工並令曹單二縣預購料物貯工備用
所有動用銀兩容臣等將黃河修堤徭夫工

食一項公同議定具

題部覆至口在於本年徭夫工食等銀抵還至

次險堤工

臣

等酌量情形陸續相機估計具

題則堤工捍衛有資修防得免貽悞運道民生

大有攸賴矣今據兗寧道傅澤洪確估造冊

詳請具

題前來

臣

等復核無異相應會同河臣齊蘇勒

合詞恭疏具

題伏乞

皇上睿鑒勅部議覆施行雍正五年四月二十七

日

題奉

旨該部速議具奏欽此部議准行雍正五年五月
二十六日奉

旨依議欽此

芝蔴莊添設弁兵

題爲循例

題請添設弁兵以重修防事竊照東省芝蔴莊
埽壩工程前經河臣齊蘇勒於請開引河以
保運道事一疏內稱山東河南堤工平時歲
修係用堡夫徭夫遇有大工撥用民夫其椿
埽搶救事宜茫然不曉猝遇緊要工程率多
觀望不前今曹縣黃河大溜北徙之處共有
四工此地切近運道關係緊要請照河南之

例將江南熟諳樁埽河兵選撥二百名遴委
千總一員把總二員帶領駐守修防其山東
堡夫應責令調去河兵教習樁埽事宜令該
管廳員時加考驗如遇兵丁缺出挑選補額
至二三年後堡夫嫻習即可充作河兵將江
南之兵掣回等因具

題經部議覆奉

旨依議速行欽此欽遵在案今查東省芝蔴莊工
程前經南工撥來河兵二百名駐工修防並

教習堡夫已經二載邇來東省堡夫內多有
熟悉樁埽事宜堪以充作河兵者應照原

題於此熟諳堡夫內揀選二百名充補河兵將
從前江南調來之兵盡行掣回本汛修防至
該處千把各弁亦

請照例於熟諳弁目內揀選拔補千總一員把
總一員仍隸黃河廳管轄其芝蔴莊工程應
派千總一員目兵一百二十名駐工修守曹
單二縣臨河大堤工程應派把總一員目兵

八十名駐工修守一應修防事宜協同額設
舖堡夫往來巡查遇有險要工程仍行一體
齊集搶護其江南撥來千總一員把總二員
應一併發回原汛度兵弁俱得專力修守而
於運道民生均有攸賴矣臣謹會同河臣齊
蘇勒合詞循例具

題伏乞

皇上睿鑒勅部議覆施行雍正五年九月二十六日

題奉

旨該部議奏欽此部議准行雍正五年十一月初

五日奉

旨依議欽此

挑挖雷家寺引河

題爲亟請開挖引河堵截支河以保堤工事該
臣等會看得儀封縣北岸黃河水勢自南岸
之青龍岡迤下山西南掃成大灣河溜直趨
北岸致將北岸雷家寺上首之灘崖刷成支
河一道沿堤走溜經宋家營刁家樓徐家堂
曲家樓狀元口楊家橋等處直至三家莊出
口五十餘里之堤工胥受其害每至水勢泛
漲激流汕刷勢如奔馬上下搶護救應不遑

甚屬險要今查勘形勢必須於雷家寺上首
廢堤頭加幫高寬接築土壩一道內外下埽
并鑲墊防風將支河跨斷不使掣溜侵堤再
查南岸青龍岡迤下水勢滌洄紆折將上灣
淘作深兜與下灣相對止隔四百一十丈上
水河頭有吸川之形下水河尾有建瓴之勢
亟宜乘機因勢開挖引河一道導水東行則
河身順直水不紆回大河之流旣暢支河之
勢自緩不特壩工可以經久捍禦而黃流全

歸正河自當愈刷愈深河灘亦能漸次淤高
俾雷家寺迤東五十餘里堤埽工程得免汕
刷之虞實於運道民生大有裨益查加幫廢
堤頭接築土壩共需土四千九百九十八方
五分每方實給銀九分六釐共銀四百七十
九兩八錢五分零又內外捲下埽個并鑲墊
防風計用工料銀一千七百九十兩二錢一
分零又開挖引河工長四百一十丈計土六
萬一千六百七十方每方實給銀八分一釐

共銀四千九百九十五兩二錢七分通共銀
七千二百六十五兩三錢三分零據管河道
祝兆鵬河北守道朱藻造冊詳請會核

題估前來

臣

等親勘覆核無異一面檄令管河

道先於河庫銀內動支給發該廳上緊興工
備挑堵築遴委諳練河員監工督催一面照
例在於藩庫內撥帑還項除原冊送部查核
外相應會同河臣齊蘇勒督臣田文鏡合詞
具

題伏乞

皇上睿鑒勅部議覆施行雍正五年十二月十七

日

題奉

旨該部議奏欽此部議准行雍正六年二月十三

日奉

旨依議欽此

附紀

治水者之開引河乃順其性而導之以水治水之良法也然非慎重詳審真知確見而率意舉行往往什不成一二以故司河者於此每徘徊瞻顧不敢輕以建議苟能分別地形之高下詳覘大溜之趨向乘機因勢而果斷行之則無不有明效大驗者雍正四年秋汛平穩曾筠恭進黃沁安瀾圖上呈

御覽仰蒙

聖鑒就圖指示將灣處取直堤工卽可化險爲平
諭令查勘具奏大哉

王猷誠得治河之三昧而洞悉乎因利乘便行所
無事之大指也維時儀封北岸雷家寺一工
因上游青龍岡水勢兜灣刷開支河一道掣
溜侵堤直注三家莊致成五十餘里之險工
該汛員弁築壩攔截水力盛大殊難抵禦會

筠
凜遵

聖訓奉有

諭旨親赴青龍岡率同河員之諳練者范昌治等
爲之準定形勢立竿標記就形導引順勢開
挑是日工程將竣天色初暝風雨驟至河頭
一開浪湧波騰勢如奔馬大溜掣入陡刷深
通沛然浩然一往莫禦回視舊日河身頃刻
沙淤並無行溜兵夫百姓靡不稱奇

曾筠與

在工諸員額手歡呼恭頌

聖天子愛民之念上格

蒼穹如神之知洞中機宜成功之速一至於此向非

睿慮周詳按圖指示則雷家寺一帶五十餘里之
堤工支流衝嚙搶救不遑欲其化險爲平而
安流底定也何可得哉蓋黃河之水其性多
曲每遇埽灣轉溜非斜趨而北卽直注而南
以致兩岸堤工或當大河頂衝或被支河汕
刷危險堪虞多方搶救試于灣曲之處乘機
迎溜利以導之則河身順直水不紆回暢達
深通自無旁射此誠以水治水行所無事之
大指也然同此黃河江南土性堅凝難於刷

動豫地則土性浮鬆易於奏效引河之法施之於豫省黃河尤得地勢之利便者也謹於該工之成志其原委如此若夫測地形之高下以定濬河之淺深或一律開挑順流直下或間設坑塘跌溢取勢至新河旣成仍將舊河首尾築壩攔截不使大溜復趨故道變態難齊事宜不一隨機應變則又神而明之視乎其時與地而斟酌補救引溜入河務必成而已矣

續留効力人員

題爲循例

題明仰祈

睿鑒事竊照河工務在得人多得一人學習將來
卽多得一諳練之人今查東豫二省黃河南
北兩岸堤工綿長千有餘里欽蒙

皇上不惜帑金

指示方畧將一切堤埽工程修築堅固兩岸黎庶
固已咸安衽席永慶平成第堤工雖經告竣

每遇大汛經臨修防吃緊之後除專管廳汛等官之外必得効力人員分投防險奔走贊勩方無貽悞是以臣於雍正二年九月遵

旨具

題事案內

題明奉

旨收錄候補州同范昌治等五十六人留工効力在案今查四年以來効力五十六員之中有已經

題補及委署試用並緣事咨斥患病回籍等員
共二十九人現今在工効力止有二十七人
每遇汎水長發各處險工需員防守除黃堦
壩賈魯河二處係河臣齊蘇勒差委南工効
力官二員分防外其餘兩岸工長汎險差委
之處甚多實不敷用因又陸續收有候選州
同王定成等二十五人臣細加揀選俱係年
力強幹堪供驅策隨卽行文各原籍查其家
道是否殷實去後今俱取到原籍印結前來

臣復查無異合無仰懇

聖恩俯照江南河工効力人員遇有

題補緣事等項續收補用之例將續收人員亦
准留工効力俾各分險巡防庶河工均收得
人之效而臣亦得臂指之助矣除將現今在
工新舊効力人員造具履歷功績清冊並取
到原籍印結送部存案外臣謹循例恭疏具
題伏乞

皇上睿鑒勅部議覆施行雍正六年七月二十八

口

題奉

旨該部議奏欽此

修建耿家寨埽壩等工

題爲詳請建築埽壩鑲墊防風並幫築內戩壩
臺增培裏月堤工以禦頂衝以衛民生事該
臣等會看得蘭陽縣北岸耿家寨臨河月堤
一道實爲大堤外護因南岸長出沙灘河勢
北趨全黃大溜直注該工是以本年二月內
有漂走埽個塌卸堤工之患經臣親駐工所
晝夜設法搶護幸保平穩其下埽失宜之原
任同知張近光業經會疏

題叅照例議處并將漂走埽料土方行文確查
照數追賠在案但查該工內臨積水深渾外
當全黃倒注大溜直射勢如奔馬怒濤衝刷
堤根水深二丈八九尺至三丈七八尺不等
加以汎水踵臨涵湧倍常實屬危險堪虞必
須於臨河上水褻頭下水樓崖外邁沉水大
埽層層鑲墊簽釘長椿堅築高寬大壩逼溜
開行再於堤內積水之中密釘排椿捲紮埽
由填實底土上面加幫內戩建築壩臺俾有

捲埽之基兼得內菲之固仍須將埽工東西
兩頭堤身再加高寬以禦上下回溜埽灣汕
刷之患更宜計圖善後將埽後裏月堤工一
律增培高厚以資重障並將裏月堤南坦估
下埽個防風庶外堤藉有倚賴得以預保萬
全查內戲埽臺並排椿埽由工長一百五丈
共估銀一千九百五十三兩五錢四分零內
除張近光應賠補舊土銀三十八兩一分六
釐外實需土方料物銀一千九百一十五兩

五錢三分零又臨河大壩加鑲埽工長九十丈實估埽料夫工銀一萬二千四百八十六兩九錢七分零內除應追張近光賠補埽料銀四百四十二兩七錢七分零歸入該工應用外實需銀一萬二千四十四兩二錢零又壩後裏月堤工一道長二百六十丈實估土方需銀一千五百一十兩八錢八分零又裏月堤南山下埽加鑲工長二百六十丈實估料物夫工共需銀四千三百二十三兩二分

又臨河堤工壩臺西首加幫工長一百二十七丈實估土方需銀三百二十五兩一錢二分又壩臺東首加幫工長一百二十六丈實估土方需銀六百四十五兩九錢二分零以上土埽各工共估銀二萬一千二百四十五兩四錢七分零內除張近光應賠埽料銀四百八十八兩七錢九分零追入該工應用外實需土方埽料銀二萬七百六十四兩六錢八分零今據河北守道朱藻確勘造冊詳請

題估修築前來

臣

等確勘覆核無異因係緊要

工程除一面先行動支河庫銀兩辦料價築
保護併將原冊送部查核外相應會同河臣
齊蘇勒督臣田文鏡合詞恭疏

題估伏乞

皇上睿鑒勅部議覆施行再照裏月堤南坦雖據
該道廳計圖善後預估埽料銀四千三百二
十三兩零但水勢變遷靡定如臨河壩工秋
汛後大溜南行工程穩固臣等再行相機減

省以節錢糧合併聲明雍正六年八月初四日

題奉

旨該部速議具奏欽此部議准行雍正六年九月初一日奉

旨依議速行欽此